

**Aalajangiiffigisassatut siunnersuut, Naalakkersuisut kingusinnerpaamik UPA2018-imi misissuinissamik agguassissasoq pitsaaqutit ajoqutillu, Kalaallit Nunaat EU-mut suleqateqaqqilersinnaanissaa pillugu. Misissuineq naqissuseeqataassaaq EU-mut ilaasortaanissamut politikikkut aningaasaqarnerup kingunissai, siumoortumillu naliliinermut, namminersornerusuni allaffissornikkut periarfissat suliamut pisinnaasaat naammannersut EU-mut ilaasortaanermut.**

(Inatsisartunut ilaasortaq Justus Hansen, Demokraatit)

**pillugu**

**Nunanut Allanut Sillimaniarnermullu Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Ataatsimiititaliap suliarinninnermini kingullertut ilaasortarai:

Mimi Karlsen, Inuit Ataqtigiit, Ane Hansen, siulittaasoq, Inuit Ataqtigiit, sinnerlugu  
Justus Hansen, Demokraatit, siulittaasup tullia  
Vivian Motzfeldt, Siumut  
Ineqi Kielsen, Siumut  
Kalistat Lund, Inuit Ataqtigiit

Ataatsimiititaliap ulloq 18. oktober siullermeerinnerup kingorna siunnersuut misissuataarpaa.

### **Siunnersuutip imarisai siunertaalu**

Siunnersuuteqartut siunnersuuteqarnermikkut kissaatigaat Kalaallit Nunaata EU-mut ilaasortanngoqqinnerata iluaqutigisinnaasaanik ajoqutigisinnaasaanillu misissuisitsisoqassasoq. Misissuinerup ineneri 2018-imi upernaakkut ataatsimiinnermut saqqummiunneqassapput, tassanilu Kalaallit Nunaat EU-mut ilaasortanngoqqissagaluarpat tamatuma iluaqutigisinnaasai ajoqutigisinnaasaalu qulaajarneqassallutik. Taamatuttaaq misissorneqassaaq Namminersorlutik Oqartussani allaffissornikkut nukissat naammannersuut Kalaallit Nunaat EU-mut ilaasortanngussagaluarpat tamatuma allaffissornikkut isumagisinnaanissaanut.

### **Siunnersuutip Inatsisartuni siullermeerneqarnera**

Aalajangiiffigisassatut siunnersuut Inatsisartuni siullermeerneqarmat aallaavittut tapersorneqanngilaq, partiit amerlanerussuteqartut kissaatiginngimmassuk Kalaallit Nunaata

EU-mut ilaasortanngoqqinniarnissaa. Tamatumunnga atatillugu ilaatigut oqaatigineqarpoq taamatut misissuisoqassappat tassani inerniliussat pisoqalisooreersimallutilluunniit annertuumik nalorninartortaqaassammata, Tuluit Nunaata EU-mit aniniarnera Brexit pissutigalugu EU-p iluani assigiinngitsunik allanngortoqarnissaa naatsorsuutigisariaqarmat. Ilanngullugu oqaatigineqarportaaq Kalaallit Nunaat namminerisaminik EU-mut ilaasortanngorsinnaanngimmat, taamaaliortoqassappallu tamanna Danmarkip ilaasortaanera aqutigalugu pisariaqarluni.

Siullermeerinninnermi Inuit Ataqtigiit allannguutissatut siunnersuuteqarput:

*”Nunatta EU-mut EU-mullu attuumassuteqartunut suleqateqarnerulernissaanik periarfissanik imalimmik Naalakkersuisut kingusinnerpaamik UKA2017-imut nassuiaasiornissaannik Inatsisartut aalajangiiffigisassaattut siunnersuut. Nassuiaasiornermi suleqatigiinnissamik isumaqatigiissutaareersut, Siunniussaqaqarnermik Nalunaarut, OLT-lu aqutigalugu suleqatigiinneq pioreersoq tunngavigalugit suleqatigiinnerulersinnaaneq suliassaqarfillu allat nutaat suut siuarsarneqarsinnaanersut ilanngunneqassapput.”*

Siunnersuuteqartup ersersippaa soorunami aalajangiiffigisassatut siunnersuutaqaartup akuerineqarnissaa kissaatiginerusimagaluarlugu, siunnersuuteqartulli naaperiuteqarnissaminut piareersimasut, ataatsimiititaliap isumaqatigiittup allannguutissatut siunnersuut tapersorsinnaassappagu.

Tamanna tunngavigalugu aalajangiiffigisassatut siunnersuut Nunanut Allanut Sillimaniarnermullu Ataatsimiititaliamut suliareqqinneqartussatut ingerlateqqinneqarpoq.

### **Ataatsimiititaliap siunnersuutininik suliarinninnera**

Siunnersuutip siullermeerneqarnerani isummat ersersinneqartut ataatsimiititaliap tusaatissatut tiguai, takusinnaallugulu siunnersuut taamatut isikkoqartillugu amerlanerussuteqartunit tapersorsorneqanngitsoq.

Ataatsimiititaliap oqaatigissavaa Tuluit Nunaata EU-mit aniniarluni aalajangereratigut nalorninermik pilersitsisoqarmat, taamalu apeqquserneqartariaqarluni UPA2018-imut isumalimmik misissuisitsinermik ingerlatsisoqarlunilu agguasoqarsinnaanersoq.

Ataatsimiititaliap aamma inerniliuppaa Kalaallit Nunaat EU-mut qanittumik suleqateqareersoq, ilaatigut uku aqutigalugit:

- Nunat immikkut EU-mut attaveqartut OLT-t EU-mut attaveqarnerat, tassunga ilanngullugu EU-p suliniutaanut peqataasinnaanerat kiisalu aalisakkanit nioqutissiat

aalajangersimasut akileraarusersorneqannginnissaannik isumaqatigiissut, pillugu råðip aalajangenera

- Aalisarneq pillugu peqatigiinnermik isumaqatigiissut aalisarneq pillugu isumaqatigiissummik tapiliussartalik
- Aatsitassanut tunngatillugu siunniussaqaqarnermik nalunaarut - Letter of Intent

EU-mik suleqateqarneq akornuteqanngitsuinnaanngilaq, tamatumani ataatsimiititaliap ilaatigut EU-p puisinit nioqputissianik eqqusseqqusinninnera 2009-mi atuutilersoq eqqarsaatigaa, naak aamma tamatumani naggueqatigiit Inuit nioqputissiat ilaatinneqanngikkaluartut, taamalu Kalaallit Nunaannit naggueqatigiinnillu Inunnit puisit nioqputissiat akornuteqanngitsumik EU-mut eqqunneqarsinnaagaluartut.

Nunarsuarmioqataagatta annertunerujartuinnartumillu tamatumunnga akuuleriartorluta ataatsimiititaliap pissusissamisoortutut isigaa Kalaallit Nunaata EU-mut nunanullu allanut pissutsini nalilersortuassappagit, pisariaqarpallu annertusarlugit itisilerlugillu.

Ataatsimiititaliap allannguutissatut siunnersuut partiit akornanni naapititseriarnertut isigaa, EU-mik suleqateqarnerup pitsaasup annertusarneqarlunilu ineriartorteqqinneqarnissaa kissaatigineqarluni, EU-mut ilaasortanngornissaq pineqanngikkaluarluni.

### **Siunnersuutip aningaasatigut kingunerisassai**

Siunnersuuteqartut isumaqarput siunnersuutip timitalerneqarnerata aningaasatigut kingunerisassai tassaassasut aningaasartuutit ukioq naallugu inunnik pingasunik-sisamanik sulisoqarnermut, aningaasangorlugit 1,5 – 2 mio. kr.-inut, naapertuuttut, aningaasaliissutitut killiliussat iluannit akilernerqarsinnaasutut naatsorsuutigineqartut, imaluunniit 2017-imut aningaasanut inatsisissatut siunnersuutip isumaqatigiinniutigineqarneranut ilaasinnaasut.

Allannguutissatut siunnersuutip aningaasatigut kingunerisassai eqqarsaatigalugit ataatsimiititaliap naatsorsuutigaa taakku annikinnerungaassasut killiliussallu atuuttut iluanni aningaasartuutigineqarsinnaasasut, naatsorsuutigineqarmat Bruxellesimi sinniisoqarfik Nunanullu allanut Pisortaqarfik misissuinerup ingerlanneqarnissaannut pisariaqartunik ilisimasaqarlutillu misilittagaqartut.

**Ataatsimiititaliap inassuteqaatai:**

**UKA2016/56**

**Ataatsimiititaliap isumaqatigiittup** siunnersuutip **itigartinneqarnissaa** inassutigaa.


**UKA2016/56-imut allannguutissatut siunnersuut**

**Ataatsimiititaliap isumaqatigiittup** allannguutissatut siunnersuutip **akuerineqarnissaa** inassutigaa.

Taamatut oqaaseqarluni isumaliutissiissummilu oqaatigineqartutut paasinnilluni ataatsimiititaliap siunnersuutit aappasaaniigassanngortippai.



Mimi Karlsen



Justus Hansen  
Siulittaasup tullia



Vivian Motzfeldt



Ineqi Kielsen



Kalistat Lund